

55638  
0422  
v.4

善行

世變

治體

廿一

戎懼

山川上下

記竹

書畫


妖祥

邊塞

記言

卷之三







BERKELEY  
LIBRARY  
UNIVERSITY OF  
CALIFORNIA

記言卷之二十二 中篇

善行

吾避亂出嶺南得絕行三一文繼達二權乙  
三東萊嫗皆前古之所罕有者也識之以為  
江右善行之首

乙初見寒岡先生先生字之曰次甲者也

嫗無子死父老皆曰賢嫗也葬而封之咸安  
放牧問東萊嫗塚

江右三絕行

孝子文繼達丕承葬標



文繼達丕承其先本湖南之南平縣人中世徙  
大嶺之南自其父祖始居三嘉縣竝木里君武  
人子雖無所學有至性其鄉有隱君子曹敬德  
先生者以女妻之君父事之其父任嘗得叛奴  
訟而治之反為所賊殺君日號哭訟於方伯讐  
族類強力行賂以求脫君與母訣曰讐不復誓  
不與共生為之七年不除喪轉訟數郡羸毀愈  
苦南方之人士感其行爭與同讐之讐計不知  
所出日夜為反殺之謀君辛苦羈旅悵悵困不  
得理常礪劍欲必聞而死嘗過峽中日暮獨行



有猛虎怒當路若令之莫之前者良久適有諸  
生應舉者偕至虎乃去遂前行讐果挾白刃潛  
伏山谷見多人至謀沮欲散去君遇之奮呼抽  
劍搏鬪諸生大驚共執讐告郡邑治之果首謀  
者辭服太守為之驚嘆賢之其叛奴窮自言盜  
殺主者十四五人而皆殺之君力竭死途中無  
子君死而其所乘馬亦流涕三日而死鄉邑父  
老為之涕泣相語以為南中孝子之異蹟悲乎  
怨毒之感尚喻於禽獸而況於人乎三年夏吾  
南遊入其鄉逢父老問其事孝子死已三十年



鄉人莫不感其至行亦稱道曹敬德先生其弟  
弘達請刻石以表其葬

孝子權乙

權乙字次甲昌原上南海上人也乙以乙未歲  
生故父呼曰乙而父死不改因遂名之父當丁  
酉之亂奔竄海島溺海死時乙幼無所知及髫  
鬣始有知從羣小兒戲嬉而歸問其母曰兒皆  
有父而我獨無何也母於悵曰汝唯童騃無所  
知遭亂父涉海死海中吾與汝孑孤無所告零  
丁至此因泣之乙驚痛悲傷之自此凡食物之



出於海者皆不食終其身未嘗對人言笑作懽  
言及父必涕泣家苦貧勤苦力作以事母日供  
甘旨以養餘力則讀書事母三十餘年母以天  
年終喪必盡其禮既三年因不去其廬為父三  
年哀毀如初人皆以為善行而浮屠禪學化之  
乙居喪六年之明年死而大疫闔家皆亡其二  
子幼穉飢寒無所依有父客憐之欲育於家教  
之如子二子辭曰以先人之故欲收恤其遺孤  
然不欲以三年之哀去哭泣之次不從聞者皆  
嗟嘆賢之



讚曰乙幼無所知生九歲能立行如此長則又學以益之又教其子以禮賢也治西安城里有孝子塚觀察使林公墀追其善行恤其家

### 東萊姬

東萊姬者本東萊私娼也 昭敬王二十五年有倭寇大掠貨寶婦女而歸姬三十餘被擄至倭中十餘年矣三十九年春有奉使者還倭既和親還前所擄獲人口姬亦得還姬有老母當亂相失歸問其母皆曰亂中亦被擄不還蓋母與女俱在倭中十年不相知姬私與其族訣誓



不見母不還復涉海至倭中行乞道路積苦海  
島遍國中得之母與女皆老而其母七十餘尚  
無恙倭人莫不大驚嗟嘆賢之皆泣下傳稱之  
聞於國中其酋長則許其母俱遣之姬以母既  
還鄉土失其資業無所料生則與其姊負母轉  
客江右住咸安放牧里其母以天年終姊與妹  
相依為生日傭任以取給凡得一衣一食必先  
姊而後已姬年八十餘死其里中皆呼曰東萊  
姬因以為號云嗟乎以女子能涉海萬里絕國  
艱難海道得母子相遇天也自古男子之所不



能者而能之能立絕世之行至使蠻夷感化賢哉

金溝柳節婦旌門記

節婦柳氏縣令漳之孫奉事匡民之女而儒生宋昫之妻也柳氏出嫁之年其夫死勺水不入口號哭不絕聲積四十餘日吊者大感常以死誓心舅姑知其有必死志晝夜守之常引古譬曉又泣謂曰吾兒不幸早夭而無子鬼神無所托忍死終年無絕其祭祀為已化者亦無憾也其心以為祭有時而盡死而同穴無窮陽示之



若返而無死意者守之以懈及葬有日晨則盥櫛正衣服而經自殺聞者莫不酸鼻皆曰賢哉節婦之行也年二十縣令金景說以事聞又縣父老金地生等上書言之天啓二年表節婦之間上之九年二月戊戌孔巖許穆記

### 節行傳

李文忠公側室女事

見完善君墓碣下

積城百姓李貴男妻丙子之亂匿於山中為賊所逼行過其廬立不動賊拔劍斫其膚劓其腹而殺之有畜狗守之三日三夜烏鴉不敢食鄉



里稱之曰異哉烈女之行也其畜狗亦知以義相報云

私屬縣北江上人趙男為兒時其父死於壬辰之亂不知死處既長為之追喪三年老而死謂其子曰我死毋埋我棄我於野安我善也其子不忍也衣之以薪掩其體而不穿不封嗟乎亦可謂孝子之心也



記言卷之二十三 中篇

戒懼

出林塢作不如嘿社誌八十有三言

出於妄皆過也皆曰過也言不可逆也駭不及  
舌故曰口生詬口戕口口之不慎禍之招也而  
况多言多敗乎恥過莫如戒心守口莫如慎嘿  
慎嘿者寡言寡言則戒專戒專則過寡故名吾  
塢曰不如嘿社書之以自警

五家十家為田社是私社古制各樹其土之  
所宜休



不如嘿田社老人十六戒

聖人不語恠力亂神怪反常力害德亂悖道神  
惑人此聖人之教也老人垂死戒口過十六其  
戒曰

行言戲譁聲色貨利忿戇矯激諂佞苟私矜伐  
忌克恥過澤非論人訛詬倖直傾訐蔑人之善  
揚人之愆時諱世變有不慎者小則生詬大則  
裁及其身宜戒之

喜怒哀戒二十言

妄喜恥隨之妄怒詬隨之喜怒哀者恥詬之媒慎



戒必敬一

自警二銘

自私者欺人天理昭著人不可欺徒自欺耳故  
誠其身必自毋自欺始

敬親者一舉足而不敢忘父母毋服闋而招咎  
毋履險而危身愛親者一出言而不敢忘父母  
毋苟訛而招詬毋苟笑而媚人

自省箴

心之官則思亦行有九思思則得不思則失不  
莊不敬怠惰放肆皆不思之咎可不慎歟得正



而斃古人勉焉勿以老死自畫書之以自省

百拙箴說

老人才拙學拙心拙志拙言拙行拙百試而百拙故名吾居曰百拙箴名不可外求出於性者然也所以識拙毋妄動之戒也

樽銘

戒之哉君子勗毋醉毋亂惟德將哉自古敗德滅性覆邦喪家矧莫非酒德荒哉故有剛制者存而沉湎者必亡戒之哉

立春之戒



天道變易歲將更始老人今年八十敬戒寅畏  
追過省僇遷善日新庶幾免恥惜耄老死之年  
悔尤尤多得正而斃古人所勉勿以年老少懈  
書之以自儆

甲寅立春癸丑臘後十六日申正一刻眉叟  
書



記言卷之二十三終



記言卷之二十四 中篇

記行

陝州時記行鈔語

火飛南有地名正東者蓋東海上小山山皆石  
山木皆松春分東望日出正中古有東海神祠  
中古移祠於襄陽山奇峭有神伐一樹則一村  
有災鄉人神事之凡疾疫有禱焉火飛嶺名在滇州南  
滇州西三十里丘山驛有孔子廟前古東人得  
孔子圖像曰立廟於丘山云

逾大關則橫溪驛苦寒五穀不生其種蕎麥下

橫溪三十里珍富驛上月井一十五里其下清  
心臺又一十五里臺在清溪巖壁上西行三十  
里大和驛

大和社觀石窟連大炬入其中堪竇四通如一  
東北行數十步窟漸高可拚傳而躋深八則無  
窮川水出焉奔流石下水聲亂耳其石多奇怪  
或如蟠螭虬結若挈者若蟠屈者或如金鐵流  
凝成怪狀不可殫記柳子厚於永州遊西山鉅  
鋸潭記石竇言流石怪形如此類耶產石鍾乳  
良陷足則石皆出鍾鼓響出而記之



驪江觀神勒寺前年罷佛殿前御室侍食之享  
今年毀闕下尼院放逐女僧

東湖訪槎亭主人得銅尺古制正統十一年十  
二月我 莊憲時得秬黍正律度鑄此制今布  
帛尺三分弱頒賜郡縣今三陟府有賜尺藏之  
入京城令小吏朴基昌於北郊審國厲之制壇  
方二十三尺二寸四分高一尺六寸六分三出  
陛東西南三陛陛三級左右無祀壇前與壇齊  
廣後出六尺六寸四分長二十三尺四分高五  
寸各去壇一尺六寸六分四門同一壇東西當

無祀壇下直相對為門壇南北八十三尺東西一百十六尺二寸壇東西北壇間九尺九寸六分

金化縣有二祠謂之元祠洪祠云遇白首老官卒問之元祠其事舊遠後世無傳之者洪祠其事在三十年間傳之如目見者丙子南漢受圍關西觀察使洪命耆節度使柳琳兩軍相繼至各陳兵以過賊大至觀察軍敗沒不出惜乎兩將不相能卒至於敗節度軍皆勁卒敢死者其師行有律行伍不亂先軍敗時賊並衝破其一



面即以游兵補其缺軍皆殊死戰賊屢敗  
賊疲勞遂攻殺其將賊乃退日暮乃令軍中四  
面皆盛張火燭設機令砲聲四起夜乃撤兵馳  
去朝日賊大舉至則見空壘而返嗟乎觀察所  
領兵不知多少敗後見殭屍遍野人馬不能行  
後掘大坑積屍而瘞之每天陰則如聞鼓角或  
跳噪亂起年年癘疫人多死云

方川東南四明山與狼川峻山比嶠最高大其  
西壽春之清平山方川主人云丙子之亂大嶺  
以西避亂士女多入四明賊知之將縱兵大掠

金化之敗兵大挫又聞北兵在下東即撤去

狼川麟蹄皆嶺內山水深處其俗亦淳朴近古

狼川之水至壽春為母津入於昭陽江下流

富林驛當寒溪洞口或曰同通洞川上皆白礫

松林往往有高崖巨壁過嵐校至龍臺三十里

皆然富林嵐校間山氣益深沿溪路絕三登二

複嶺三十里

自富林至寒溪寺三十里又至襄陽八十里云

龍臺者不及彌首坡北有雙石峯是也大川流

雙石峯下上流新安驛九十里為百川下流彌



首坡水西流入於此一

嶺下巖壁間溪水積焉名曰賊潭此東海魚鹽之路大嶺之下商賈之所過嘗有過之者殺人而沉之因以得此名嗟乎惡溪貪泉豈水之罪也交趾之富鱷魚之暴能辱名如此書之以為同流合汙蒙惡名而不恥者戒

祥雲驛亭最佳天啓末觀察使崔公覲巡行東界登臨嘆之曰不出數十年當墟矣其後人物多灾或死或移亭果幾云

壬寅正月記行

伽利坡原州維嶺南麓大嶺從丹丘驛山谷行  
一十五里踰嶺出谷又一十五里新林驛新林  
南橫嶺湖西堤川縣境橫嶺外嶺其南義林  
池自嶺西湖西初境大澤堤川以外有湖西之  
名以此澤故也其東榆嶺寧越境逾榆嶺則龍  
井龍井者泉出巖竇其中潭水水旱祈禱

寧越問魯陵在郡西官道上古時郡小吏嚴興  
道者收葬魯陵云今郡有吏民嚴姓者族類甚  
衆舊遠不知其世必其後世子孫不絕耶與太  
守尹侯舜舉同登錦江亭酌話乘舟過亭下石



壁從上東谷口至石嶺四十里皆高壁青溪往  
往白礫深潭

通嶺則平昌境又三十里上摩嵯嶺旌善境山  
峻深阻下嶺則大川過谷口此太白薩奈前川  
下流從大川山逕或高或低深山沍陰巖巒噴  
合白日不照石洞往往有潭水其木多紫檀黃  
楊聞怪鳥至易吞三陟境有栢田

登蔚吞為大嶺山木多檜東界舟材所出下蔚  
吞則坪吞蔚吞之水過蓼助吞葛田至臨溪坪  
吞西南去黃池三十里

蓼南為巾衣自蓼南登嶺上不過里餘登臨則  
其外萬壑層巘俯瞰杳冥西南望太白雪山塞  
空絕頂埋雲霧不可見雲霧下見榆嶺其外百  
石坪

自易吞東南為巾衣巾衣東北竹嶺其山頭陀  
其間菖田蓼最山中佳村多壽考其民供紫檀  
弓幹凡瓌材蓼冬布麻之賦

八月觀洛山寺與京叔談易京叔曰焦延壽易  
林因象寓言變易深怪欲見奇於百代其文實

淺近易見云

時京叔為襄陽



日夕遊義相臺夜望月出此八月十八日也海上常多雨有雲霓乍開乍合月上光影透出可望至朝陰曠少晴海色騰曜日光閃爍紫氣輳輳慌惚尤奇昔時吾嘗避亂出東界正月十五日金壤通慈院觀月出其三月至羽溪觀日出光曜如火矚目炫煌紫氣滿海與今日觀望尤異焉其年久旱而今年多淫雨太陽之光亦水旱隨變云

天吼山雪岳東麓別山在遼城南境石巖神秀為九峯東臨大海山大鳴則大風故山名曰天

吼山有風穴南有石達麻北望仙人臺臺上有  
仙人井海上永郎湖十里湖上皆白沙松林往  
往有奇巖其外大海海上多大澤永郎湖最絕  
勝

記言卷之二十四終



記言卷之二十五 下篇

妖祥

妖祥見於歷正閏古書記之字星光芒短而四  
出彗星光芒長參參如帚長星光芒直指或竟  
天或十丈或二丈三丈長星主兵刑

綱目註

五年乙巳十月

西漢李尋論裁異書曰辰星主正四時王政絕  
而不行則辰星伏不見而為彗孛四孟皆出為  
易王命四季皆出星家所諱察於細微誅放佞  
人防絕萌芽蕩滌濁穢消絕積惡禍亂不成既

往之咎來事之師也大辰者大火也天之所以示民時而天下之所取正故謂之大辰自食五度至尾九度於辰為卯

春秋傳曰字者惡氣所生間亂不明之貌彗者除舊布新也

晉書天文誌曰妖星二十一其一彗星胡氏曰姦雄亂豎各勵其芒掃王室如掃之為

月建子中旬甲午大雪因霧暗道路不見人馬草堂梅吐萼如春沃水濯塵花香益芳烈欲咏梅忽不樂嘆息良久今年冬暖雷不收聲雨澤



滋物花發草青吾又灌梅亦以私意助妖而不覺也識之

春秋隱公九年三月癸酉大雨震電庚辰大雨雪傳曰周三月夏正月也大震電陽失節也大雨雪陰氣縱也人為感之也

五行志曰雨陰也雪又雨之陰也

僖公二十九年秋大雨雹傳曰陰陽之氣和而散則為霜雪不和而散則為戾氣為暄霾雹者戾氣也陰陽臣侵君之象也當時季氏世卿政在大夫

三十三年隕霜不殺草冬李梅實天失其道草木猶干犯之况君乎四時失其序其施必悖五刑失其用其權必喪

日食春秋傳曰日者衆陽之宗人君之表而有薄食之戮咎象也妾婦棄其夫臣子背君父政權在臣下夷狄侵中國皆陽微陰盛之證也

記曰男教不修陽事不得則謫見於天日為之食天子素服而修六官之職

夏書曰乃季秋月朔辰不集于房瞽奏鼓奮夫

馳廢人走



周官鼓人救日則詔王鼓太僕贊王鼓庭氏以  
救日之弓矢射太陰

諸侯用幣于社伐鼓于朝退而自責

記曰婦順不修陰事不得謫見於天月為之食  
后素服而修六官之職

周官鼓人詔王鼓太僕贊王鼓庭氏以救月之  
弓矢射太陽

日月之食陰陽相勝之變也

李尋曰日者衆陽之長光輝所觸萬里同晷人  
君之表也君不修道則日失其道晝昧無光各

有云為其於東方作日初出時陰雲邪氣起者  
為牽於女謁日出後為近臣亂政日中為大臣  
欺誣日且入為妻妾役使所營

晉穆帝永和七年涼州大風拔木黃霧下塵易  
傳曰聞善不予茲謂有知厥異黃鵠咎顰鵠災  
不嗣黃者黃濁氣四塞天下蔽賢絕道故災至  
絕世

明帝太寧元年正月黃霧四塞二月黃霧四塞

晉書五  
行志

夏小正正月啓蟄雉震响月令二月草木萌芽



雷乃發聲八月水始涸雷始收聲冬月霜露之  
氣不和氛霧冥冥雷乃發聲發天地之藏諸蟄  
皆死民疾疫又隨以喪命之曰暝月傳曰陽失  
節而陰氣縱也陰賁陽臣侵君也

春秋傳石隕于宋五隕星也後五年楚人執宋  
公子孟以伐宋請服而釋之又明年與楚戰於  
泓宋師敗績

石言子晉魏榆師廣曰石不能言或憑焉作事  
不時怨讟動于民則有非言之物而言於是晉  
侯方築虎祈之宮叔向曰宮成而諸侯必叛君

必有咎夫子知之矣

晉惠帝時地燃火疹土也

唐貞觀時石燃于幽州

高麗仁宗明宗時有地火

我世宗時寧海有地火文宗時尚州有地

火其所焚石塊如炭置火中則生火

成宗時寧海地燃晝有烟夜有光

五行志京房易傳曰顓事者加誅罰絕理厥災  
水其水雨殺人以隕霜大風天黃飢而不損茲  
謂泰其大水水殺人避過有德茲謂狂其水水



流殺人也。已水則地生蟲，歸獄不解，茲謂追非。  
其水寒，殺人追誅不解，茲謂不理。其水五穀不  
收，大敗不解，茲謂皆陰。其水流八國，邑隕霜殺  
穀。

說曰：不敬鬼神，政令違時者，霧水暴出，百川涌  
溢，壞鄉邑，溺人民，濡兩傷稼。

黑霧黑氣，黑祥也。

水中有火，火沴水也。氣相傷曰沴。

董仲舒曰：百姓愁怨，陰氣盛者，大水。

京房易傳曰：內淫亂，賢人潛，國家危者，亟異水。

赤流

役繁賦重者其罰江海涌溢

傳曰田獵不宿飲食不享出入無節奪農時有  
奸謀者木失其性為變為怪

說曰木者少陽貴臣卿大夫之象也其有害  
則陰氣賸木木先寒故得雨而冰又曰木冰者  
木介兵甲之象也

天戒若曰旂所以掛三辰章著明也旂竿之折  
高明去矣

賞刑濫而官廢事者厥罰常燠霜不殺草於是



有草妖屬孽樞李寒華

京房易傳曰祿不遂行為欺安祿逸樂為亂厥  
咎常燠燠則虫生之其燠夏則殺人冬則物華  
實

臣安祿位德無常不黜無德興東作爭者螟溫  
而風則螟

昔三苗之亡五穀變種草妖也

說曰耀虛偽讒夫昌邪勝正者焚宗廟燒宮館  
京房易傳曰君不思道厥妖火燒宮

朝廷亡禮內外咸怨極陰生陽於是有赤氣赤

祥

不聰之咎急厥罰恒寒百穀不生上下俱貧有  
黑眚黑祥晉孝懷時黑氣四塞近黑祥也元帝  
時黑氣蔽天日月無光

傳曰修宮室飾臺榭內淫亂犯親戚侮父兄者  
稼穡不成

說曰土失其性則雖無水旱之災草木百穀不  
熟

京房易傳曰地裂者臣下分離不肯從上之象  
也



晉穆帝永和七年九月峻平崇陽二陵崩帝素服臨於太極殿三日

京房曰小人剝廬厭妖山崩陰乘陽弱勝強又曰陰背陽則地裂劉歆曰國主山川山崩川竭國之大災

山崩水湧說曰山陽君也水陰民也天戒若曰君道崩壞民失其所春秋梁山崩漢齊楚之山發水同事也

唐武后垂拱二年雍州新豐縣大風雨震電有堆阜自出高十丈有池周三百畝池中有龍鳳

形禾麥之異武后以為休應名曰慶山

劉歆曰春秋石言于晉金石同類也劉向曰石  
白色白祥也

秦始皇時有石隕班固曰石陰類臣將危君

吳孫亮時山石自起立其說曰石立於山說曰  
此白膏也京房易傳曰石立如人庶士為天下  
雄謂之石瑞

晉大安元年有大石浮川水二百步而登岸

建興五年石言于平陽

元康三年二月毀前六鍾皆出涕天戒若曰兵



猶火也不戢將自焚

鼓妖有聲如雷劉向曰無雲而雷君不恤下臣下將叛

鼓妖李尋曰人君不聰為衆所惑空名得進則有聲無形不知所從揚雄曰君聽失之象也

京房易傳曰妄殺亡法厥灾霜霜夏殺五穀冬殺麥

霜雹雨雪傷木麥豆陰脅陽也

雨陰也雪雨之陰也

京房易傳曰夏雪戒臣為亂也

地震劉向曰金木水火沴土也伯陽父曰陽伏

而不能出陰迫而不能升於是有地震京房曰  
臣專則必震劉向曰臣下強盛將動而為害也  
晉懷帝永嘉三年五月大旱梁淡池水竭河洛  
江漢皆可涉

京房易傳曰欲德不用茲謂張厥災荒旱其旱  
陰雲不雨變而赤因四際師出過時茲謂廣其  
旱不生上下皆蔽茲謂隔其旱天赤時有雹殺  
飛禽上緣求妃茲謂僭其旱大溫無雲君高臺  
府茲謂犯陰侵陽其旱萬物根死庶位踰節茲  
謂僭其旱澤物枯



衆逆同志至德乃潛厥異風其風也行不解物  
不長雨小而傷政悖德隱茲謂亂其風先風不  
雨大風暴起守義不進茲謂耗其風與雲俱起  
折五穀莖臣易上政茲謂不順其風大焱發屋  
賦斂不理茲謂禍其風止即溫溫即蟲諸侯專  
封茲謂不統其風疾而樹不挫穀不成辟不思  
道利茲謂無澤其風不搖水旱無雲傷禾公常  
於利茲謂亂其風微而溫生蟲蝗棄正作淫茲  
謂惑其風溫螟蟲起害有益人之物諸侯不朝  
茲謂畔其風無恒地變赤雨殺人

不思之咎恒風凶短折為夜妖為華孽為牛旤  
為黃眚為黃祥

巽為風管輅曰大風執政之憂也

夜妖大風晦暝劉向曰正晝而暝陰為陽臣制  
君也

班固曰夜妖者雲風並起而晦暝與恒風同象  
劉向春秋說曰天戒若曰勿使大夫世官將令  
專事暝晦公室卑矣

牛旤女孽於易為坤為土為牛為牛旤

京房易傳曰殺無罪則牛生妖



晉大興元年有牛生犢兩頭八足兩尾一腹又有牛一足三尾兩頭政在私門上下無別

馬既易妖曰君氣毀則有馬既馬多死及為怪有臣下伐上之病

晉大興二年有馬生駒兩頭司馬彪曰政在私家

天子諸侯有不惠下者六畜能言

傳曰言之不從厥咎僭厥罰恒陽厥極憂時則有詩妖時則有介虫之孽時則有犬既時則有白眚有白祥

君炆而臣畏者言不通言不通則怨怨則謠於是  
是有詩妖

失在過差者僭刑罰不中羣陰不附陽勝故其  
罰擅陽旱傷百穀

陽氣生蠱蝗介虫之類也

京房易傳曰說人在側犬生妖

傳曰不恭不肅者必罰恒風屢極惡時則有服  
妖時則有龜孽時則有雞鵠時則有青眚有青  
祥惟金沴木也

君失儀則臣下有言其上者



秦鑄巨狄晉鑄翁仲謂之服妖

妹姬冠男子之冠而桀亡天下何晏服婦人之服而晏亡其家其咎均也

晉之亡冠小而衣裳博大上小下大禪代之象也

龜孽水類動也易妖曰魚去水入道路兵且作  
螽劉歆從介虫之孽與占魚同

有雞生角而墜天戒若曰角者兵象墜者不終  
之象也

雞既水年雞多死及雞為怪

京房曰牝雞化為雄鳴主不榮天戒若曰臣陵其上不鳴不將不從之象也

易妖曰君用婦言則雞生妖

京房易傳曰辟退有德厭妖水鳥集于國井

晉孝武時有鵲巢太極東頭鵲尾又巢國子學

堂西頭又巢東宮西門此白黑祥

高堂隆曰詩云惟鵲有巢惟鳩居之

人病晉太始五年有元城人年七十生角謂之  
人病元康中女化為男京房易傳曰陰昌賤為  
貴之象



有人有男女二體者男女氣亂妖形之作也謂  
之人妖亂之象也

宣祖十六年癸未朝廷有朋黨相攻擊許學士  
對竄甲山其夏有神妖降于甲山雖肝然鉅齒  
蓬髮左握弧右握火擊鼓彎弓以攘之於是許  
學士作逐厲文守庵公聞之曰自此十年東方  
有大亂後十年壬辰果有日本之倭大亂七年  
始定

詩言卷之二十五終

記言卷之二十五終



記言卷之二十六 下篇

世變

虛庵事

鄭希良淳夫者本首陽人好高節恥與惡人居  
恥與惡人言博文多學尤深於易數究陰陽之  
運化善推占通變之法術別自號虛庵者也弘  
治八年選國子壯元我 康靖王薨七日既成  
服率太學諸生上疏言為 大行作佛事事所  
言太切謫西海尋釋之其年擢大科以文學重  
於時在翰苑極言禁中事明年戊午累遷奉教

寵賚之甚善秋史禍作金宗直詆毀先王不  
道掘其塚斬屍金駟孫權五福權景裕李穆許  
磐黨惡貶損先王以大逆棄市姜謙杖一百邊  
邑為奴沒入其家表沿沐洪瀚鄭汝昌公子松  
犯亂言姜景叙李守恭鄭希良鄭承祖不告奸  
皆杖一百流三千里李宗準崔溥李龜李胃金  
宏弼朴漢柱任熙載康伯珍李繼孟宗直門徒  
非議國政各杖八十皆邊邑付處為烽燧庭燎  
干希良初配義州三年量移金海一年毋役秋  
以妖孽寬釋諸囚乃得還廬於德水常嘆息曰



甲子之禍甚於戊午一日亡去以絕蹤不知所終初家踵得之祖江沙壩上遺其巾履杖而已以為溺水死五月五日年三十四無子其妻埋其遺衣服用亡日以祀之 康靖時燕山母妃既賜死死燕山及即位心怨之慎守英者以王后弟寵婢用事告匿名書誹謗朝政負罪者快怏怨望遂有甲子之禍尹弼商韓致亨韓明澹鄭昌孫魚世謙沈澹李坡金升卿李世佐權柱李克均成俊坐廢母妃事皆致之極刑致亨弼商克均成俊并族其家洪貴達權達手李幼寧

卞亨良李守恭郭宗藩公子深源朴漢柱康伯  
珍崔溥成仲淹朴閔李龜金宏弼申澄沈順門  
姜訥金午齡鄭隣仁李冑趙之瑞鄭誠謹鄭汝  
昌或以宗直門徒或以敢諫皆僂死而其已死  
者皆僂其屍或親戚皆連死後二年燕山廢大  
釋囚徒連坐者皆得還金宗直以下皆復其官  
或傳嘉靖間陶叟李先生讀易於小白山中有  
老釋訂正其句讀甚善先生疑其為虛庵也試  
問之曰釋知易乎辭謝不答又問釋知鄭虛庵  
乎曰虛庵為誰先生為言之曰然吾嘗聞其姓



名亦略知其為人也曰世既易矣禁亦釋矣虛  
庵不出何也曰其人者亡去母死不終喪不孝  
事君亡君之命不忠安有不忠不孝而立於世  
也先生心以為虛庵也欲厚禮之釋起去仍不  
知所之云今見戊申史禍記事載虛庵事亦言  
此事如此嗟乎攷其心與事使人出涕如斯人  
者古之所謂清士者也當世變遷世遁跡以沒  
身而不悔特其行卓然尤奇有遺文傳於世清  
苦絕俗其文亦然

趙侍講遺事後題

趙侍講之瑞當燕山時忤直諫被極刑死士林  
悲之至今悲夫天之生善人不偶然而卒則殃  
孽其身遂為為善者戒何哉傳曰歲寒然後知  
松栢之後凋故桀之世有梅伯紂之世有比干  
剖心而不悔孔子曰仁也雖當大昏亂之世君  
子有直義而不回盡忠不辭死視殺身如嚙欲  
於是義明而行益著以彰直道於後世有以勵  
百代而為忠臣志士之勸不微天之生善人不  
偶然固如此又其婦人成烈女之行聞者嗚咽  
多足悲者故吾表而書之趙侍講遺事後



崔守愚事

守愚崔先生永慶字孝元南真弟子也性至孝以篤行宣祖召拜持平不就後拜司畜時黨議已成連已丑獄死初牛溪隱者與先生甚善沈義謙以外戚方貴用其人好任俠能致客禮接士大夫牛溪亦見待頗厚先生恥之遂絕不見時相國澈亦名位貴盛好節儉自遂名先生曰索性小人澈聞之怒及己丑獄起有告引吉三峯者而不得其人澈當論囚揚言曰南士有與賊通者遂令其客造言以為吉者慶也三峯

言言卷之五

別號也賊徒故匿其名陰相號別以此傳播衆

口令人人習聞積疑已成獄既平澈白上遣

御史南中以安士民心陰令御史發崔永慶事

以實吉三峯之語而御史吳億不從其所指澈

計沮乃使兩南監司兵使啓上獄事復起而

令先生對獄自陳與罪人通書來往若有罪無

辭者而先生實無三峯之號也上知無事即

釋之而澈又令兩司請再鞠先生卒瘐死獄中

後上悔之命追爵之廩以養其妻子而深咎兩

臣至謂凶渾毒澈云先生洪牛溪使其子



問之曰見嫉於誰某而至此也先生曰吾見嫉於若父後有再鞫之事有儒生金宗儒善山人學於牛溪者也諸弟子私遣宗儒抵牛溪所乞解牛溪默然久之曰其人偏僻亦言或自號三峯云宗儒退而咄咄曰守愚死矣相國澈實主獄而守愚弟子深咎牛溪以此故也先生卓犖有高氣白髮鬚眉儀狀甚嚴使人望之可畏李相國恒福時為推鞫問事嘖嘖曰曰問囚得見巨人左相金公命元亦稱之曰雖在縲絏之中凜然使人起敬云先生有僕隸亦械繫拷問之

或私謂曰須戒飭獄詞毋令異同也先生曰人  
各自言何說之為終不應先生方疾革諸弟子  
曰獄卒請一言教弟子無他答但書曰正遂絕  
字不成聞者悲之先生在獄中向必北面一息  
未絕亦不變先生六十二白沙遺稿有己丑錄  
載先生冤事甚悉後其子孫聽用事者言匿之  
有偽作己丑錄行於世先生初見南冥南冥許  
以為高士也先生辭持平疏曰當今國是靡定  
公正不行朋黨成風紀綱日墜此實消長安危  
之幾云



鄭困齋事

困齋先生鄭氏諱介清 宣祖世徵士也先生篤信好古隱居教授弟子日進先生率弟子行鄉飲酒之禮於大安學舍州牧柳夢鼎往而觀其禮歎曰三代之禮在此薦其賢為州訓導先生嚴師弟子之禮施教一以小學監田鄉約重冠婚喪祭有鄉校生洪千璟者嘲笑不率教州家責罰之反造言誹謗始此柳侯去先生亦謝歸金公誠一來代之更以禮請之先生終不就宣祖聞其賢累除官皆不起時校正經書義

大召諸儒先生亦召至京即辭去後拜典牲主簿上疏言道德立本之說 上嘉之下教曰乃今得見至論欲召用之辭以親老除近邑以便養遂為谷城縣監半年謝歸時日本倭將有變試我多無忌 上憂之問群臣誰可任將者領議政朴淳薦之曰鄭介清既以儒術致名而實有將帥才其人真可任將朴公家素多書先生嘗求觀書朴公心賢之待以客禮先生素不與議政澈之為人或言其有清白操可取先生不答但曰其人飾情偽行非正人也澈聞之深怒



之未久有鄭汝立上變事獄既成澈令郡邑廉  
問罪人黨與當捕者人莫知所以也羅州人有  
五六輩發告鄭介清與罪人通狀先生與罪人  
初不識面者而校正經義時得相接而已澈客  
丁巖壽洪千璟等共為羅織云及按問皆無實  
上意始解澈曰介清雖自言無罪嘗著排節義  
論惑亂人心其流之害甚於洪水猛獸拷問之  
南方之俗好氣任俠不循法度以為高先生作  
東漢節義晉宋清談說以警俗澈以排節義格  
上以激之也 上以方治叛逆甚怒令學士草

教一一辨釋其言布告四方以正士習介清照  
律配去初配渭源澈改極北之慶源六月至阿  
山堡月餘先生歿後柳相國成龍白上曰鄭  
介清平生以經術行誼自勵偶然日一著論卒  
至滅身云先生有所著隨手記九卷愚得錄三  
卷當獄事搜括罪人書至上覽之曰此讀古  
人之書者也下縣邸給其家皆失之惟愚得錄  
傳於世後鄉人立祠其鄉以祀之孝宗時澈  
黨復用事白上毀其祠

奇相國事



相國姓奇氏本德陽人初名自靖後改自獻字  
士靖己卯名臣應教導之曾孫也少以才藝發  
聞二十一陞太學二十九擢大科選入翰苑既  
光顯於朝沉毅有力量無細故數數態色、宣  
祖信任賢之常侍帷幄為大司憲論微士崔永  
慶寃死事當時鍛鍊成獄者皆抵罪而其已死  
者皆追奪官爵及為右相王子璣生 上素不  
快於世子欲易世子私問公公對曰建立已久  
人心已固不可動也縱不果易然 上心已定  
矣有大臣居公右者執國命 上亦專任之公

遂謝病光海時復入相時事已大變矣用事者  
屢起大獄日以論死制人公每議獄務寬平傳  
生議者不數而亦不使之覺也常言曰匹夫之  
死生不足為國家存亡之大數也光海殺王子  
璘鄭蘊上疏力諫光海怒欲殺之公執不可光  
海不得殺囚之耽七羅十年 大妃閉時諸阿  
縱者爭言當廢上書者至累數百人下政府議  
公雖極言往古成敗之事以冀改悟然獨爭力  
諫不足以動上意請廣收群臣議坐政府會宗  
室文武百官雜議於是三司論以黨逆欲沮其



議也公不為動故久坐不起議畢上皆畏懼終  
無一人敢言不可者公嘆之曰有宗室貴臣休  
感共之者亦不顧大義負國家至此耶曰出國  
門繼而有故相李恒福以下諸言不可者皆重  
於時而盡斥去公竄吉州人心擾亂鄭仁弘初  
既主張此事者而當上議為兩端說曰君臣毋  
子名義出天而不可易爭論者皆惜此名義云  
至此光海亦心畏難閉之西宮而已亦莫之敢  
顯言廢之也公實有力焉李爾瞻既用事日久  
能禍福人惟所欲自公卿以下反目畏事之公

獨自重無所憚瞻忌嫉之殊甚顧無詞以斥之也至是乃寬初光海幾不得立賴公既得立心德之尊寵賜賚之雖一朝放流之示譴而已特召之待之如舊而見國勢已去知不可有為也東遊海上不復預國家事矣 仁祖反正時功臣等私遣韓嶠試公意欲問計公心知之佯聾再問而再不答嶠去而功臣等相謂曰彼大臣持重多智彼既得志行其所為吾等不得禁遂不召其人多執法時論法抵罪者之親屬諸客積怒於公者反為必報之計陰求其過日密



仁祖既反正收召先王舊臣而公不拜相識者皆知其必死也功臣等既成功陰設機所忌者皆殺之次及公惟元功李貴獨言公無罪不當死尋陷大獄付處瑞山陰使人告有變詔王府召問之公對獄自言無罪且曰熒惑入南斗可移於相必殺臣以弭災時李适叛書聞功臣等大懼陰謀曰囚不殺必內應為亂密白上盡出公及士大夫失志者三十七人皆斬之公以大臣不加誅令之自處於是公之昆弟諸子皆僇死奇氏族矣後李相國元翼白上曰奇自獻

當宥及苗裔者而其身不免親戚皆死甚可哀也李資成貴亦為上言之上始感悟命復其官公布衣時從先生長者習聞古人餘教嘗為東省執弟子禮見朴洲先生後薦士二人趙穆朴洲不出樂山澤之遊多所博觀外家遐遠奇偉之術而門無迂怪客言神仙者



記言卷之二十七 下篇

山川上

聖居天摩古事

七年夏病卧無人事住二山古事五冠松嶽  
帝釋諸山實二山之傍麓別山而聖居最宗  
云

古九域之地自新羅崇佛教歷高麗千五百年  
深山絕境人跡所不通亦多浮屠古跡如聖居  
天摩在開京址五十里前古山中建立寺院事  
佛無數本朝尚文教麗亡且三百年亡麗古事

今皆荒廢往往猶有浮圖碑塔不毀遠者或七八百年自石頭壽陵至聖居壽陵絕頂有大澤謂之天池聖居者勾麗之九龍山或曰樂浪之平那山山有國祖祠號曰聖居山山有南北二聖居北西南三桑靈皆蘭若名山氣至此最深北聖居上有法達窟法達者古祖師名其上有鐵鉤攀登絕頂

南聖居下圓通寺圓通者古尋跡寺浮屠人相傳古人得觀音佛跡化為佛有此名云後人作圓通寺最在山中今有浮圖石窠古遠不知年



代

絕頂西麓通聖窟前古塞其窟窟前有泉水鳥  
翔集

絕頂北國祖祠東壑福興今有霍石塔其上日  
宿

絕頂西南次峯有元曉義相臺義相臺在元曉  
南又其南仁達金身其下沙彌發源金身下有  
金身寺又其下金身窟仁達西有仁達石塔

絕頂西北麓有古聖

金身東為悟道嶺又東為靈鷲靈鷲南玄化麗

史顯宗十二年三月玄化北山崩出玉八月王  
幸玄化寺命學士周行作玄化碑叅政蔡忠順  
書碑王親篆曰靈鷲山大慈恩玄化碑又有淳  
圖石塔

毅宗二十年三月王祭佛於金身寺明年三月  
幸靈通寺微行至金身窟受釐遊宴玄化寺玄  
化有清寧齋衆羨亭有南池蘆葦鳬鴈之觀又  
如歸法寺

二十四年春狼星見於南極以為老人星見西  
海道驛聞時王遊玄化寺命大祭老人星於諸



壇受群臣賀其年鄭仲夫之亂作弒王於坤元寺

金身西為五冠山其下靈通寺地誌謂摩訶岬今其北有祀壇春秋仲月小祀在祀典

五行誌曰仁宗六年冬靈通寺銅鼓鳴十二年春大旱王幸靈通寺禱雨毅宗元年五月王禱嗣於靈通寺講華嚴經五十日二年夏山中大雨一夜靈通川水溢上山崩民多淹死二十四年正月王幸靈通寺設華嚴會

靈通寺有舊名古碑字剥落不可讀

麗時有孝子文忠居五冠山下作五冠曲傳於  
樂府

靈通谷口花潭潭上古有隱者徐敬德先生林  
居今有花潭隱者之祠其上有徐先生塚

五冠東為鳳嶽其下華嚴華嚴有恭愍王圖像  
麗之遺民屢出布共真殿傳且累百年氓俗猶  
有大國遺風浮屠傳守貝葉經西竺梵文或傳  
指空書云又有指空等身其東南佛日光宗母  
順成劉太后願堂今有石塔半毀麗史光宗二  
年作佛日大奉恩大奉恩太祖願堂在開京南



麗史太祖天授四年作大興寺于五冠山迎淨  
屠師利言光宗六年重作大興寺王幸落成道  
場

朴淵在聖居天摩二山之間為大瀑有上下淵  
水旱用牲幣五行誌曰忠烈十九年冬朴淵涸  
今龍祠下有太宗臺朴淵之水北流過帝釋山  
下為五祖川淵上古題明寺題明者麗僧上有  
千樹栗又海松千樹皆題明所樹云八月貢其  
實

麗史太祖天授七年作外帝釋院文宗每以成

平節設祈福迎祥道場七日成平節文宗壽節也仁宗十八年夏旱王親禱帝釋院毅宗七年王幸外院設羅漢齋祝釐西井靈下雲居過淵上觀音窟有石觀音在天摩東麓頂光峯下頂光西彌勒峯又西文殊峯彌勒南普賢峯天摩峯在文殊南其西蘿月峯

麗史忠穆王四年冬王病使贊成事李君佺設水陸會於天摩山行禱

天摩南松嶽麗俗好鬼神山上有淫祠

安和寺在松嶽東麓有古井其谷曰紫霞之洞



麗史太祖既定都作法王王倫諸十刹於王都其遺戒曰道說推占山水違順建立寺院後世妄加浮屠者說之禁也

祀誌曰凡水旱祭百神於松嶽川水上曰川上祀

麗史德宗三年五月石隕于松嶽

睿宗十三年重修安和寺宋道君皇帝命太子太師京書門額靖國安和寺五大字以賜之又賜十六羅漢塑像毅宗十二年幸安和寺賦石井之詩

忠惠後三年八月松岳鳴

禍元年八月松岳祠鬼哭如人哭

圓通碑

圓通僧海清斲石為碑曰其徒道隱踵吾門  
乞銘曰山中古事不可以不識也今吾子多  
聞前古又能言之不得吾子銘猶無碑敢以  
請吾應之曰諾略叙載籍所傳以識之其銘  
曰

蘓南石頭壽陵蒼蒼天池泱泱衆山嶸鬱平那  
天摩嶭嶭峨峨國祖是裡神靈所都寔為聖居



嶽祠神川百靈修虔不瀆不愆壇場祗肅牲幣  
有常鬼神洋洋隆古之盛德洽顯位玉璫呈瑞  
弈弈松嶽扶蘇古岬鎮茲神邑歸法玄化金身  
帝釋亡王往跡陰崖絕境巖曲崛岉往龕攸窟  
圓通石龕華藏貝葉摩阿靈塔學士之銘樂浪  
之記瓌怪詆詭古事流傳衆人之譁耆耆之嗟  
刻之山石略舉終始以告千禩

歲強國協洽穀雨節

白雲山

白雲山圻內大山永平縣治東二十里水洞有

卧龍臺水中石臺袤數十丈水深多石川上皆  
長松脩峽其上社堂十里川水發源於山中兩  
岸多白礫深松往往多盤石噀巖三十里皆然  
深入有石場可坐數百人川水至石下為溪潭  
其下石灣過石場山益深水益清滿谷皆松至  
此潭水綠淨多鯈魚其上白雲寺登前樓前對  
石巖高壁臨溪東州作壁記新羅僧道詵初創  
之至今八百餘年崇禎間五臺僧贖凜重創云  
東隅有西僧釋敏浮圖迎月東牖望蟾巖石峯  
九月十二夜月出其上前溪上下多盤石可遊



其上曹溪踰小嶺五里古禪寂一作積有道誅浮

圖其上上禪八山中巖洞二十里山深路絕而

極者也積凜所等其下般若有自休積凜浮圖

蟾巖西麓普門釋敏所等亦佳寺終日見山下

人拾木實者滿谷前年冬至花開自臘月至正

月積雪苦寒大木多凍死三月無花自二月至

五月不雨自六月下旬至九月不雨又早寒百

穀不成草木不長山木多枯死可謂極無

白雲南華嶽在圻關之境據壽春洞陰嘉平之

地周三百里其西麓積石嶄巖至絕頂而極雲

霧晝晦人畏慄不敢登其巔天旱則郡邑發多人躡其巔得雨春夏之交大雷電雨雹自天摩朴淵從翔北過末地藏禾積三釜鶴嶺連白雲絕頂至華嶽而止山中人謂之龍移

紺嶽山

九月廿九日寒山訪宋上舍上舍行年八十七我仁祖二年進士孝宗時賜爵八十以上者而上舍不受爵白鬚瘦高樂山澤之遊上舍三世大年謂之寒山壽考之世者也與我遊紺嶽夕宿於見佛晨則登絕頂陰崖汲神井其上



紺嶽祠石壇三丈壇上有山碑舊遠沒字傍有  
薛仁貴祠堂或曰王神祠為陪祠其神能作妖  
以禍福食於人山皆石峯絕頂二千三百丈通  
望甚遠其東摩嵯其外王方又其外華嶽白雲  
東址懽喜石臺在圻開之境其外高巖古貊地  
西北平那天摩南望三角道峯其址大江自烏  
江為峨湄鄒蘆石岐臨津至祖江一百里祖江  
西古江華江華西延平洋實燕齊之海神祠傍  
山石間石窟觀石老子露頂被髮拱手若有神  
太史遷作老子列傳稱孔子曰鳥吾知其能飛

魚吾知其能游，數吾知其能走，至於龍吾不能知其乘風雲而上天。吾見老子其猶龍耶！老子為周柱下史，正義曰：周平王時，老子見周衰，著書言道德五千餘言而去。孔子世家曰：孔子適周，問禮於老子。當景王時，去平王十二王，其傳曰：孔子死之後，百二十九年，史記周太史儋見秦獻公，言秦與周合而離，離而復合，合七十年而霸王者出焉。儋即老子，索隱曰：自老子生年至孔子時，百六十年，至太史儋二百餘年，蓋老子莫知其所終，今攷其石記，成化四年建等身。



云坐石上採石葺本草曰靈芝生名山石崖其  
西石峯下雲溪寺觀雲溪瀑布其北洞鳳臺鳳  
臺西古隱跡夕從東麓下記之

白鷺洲記

京城東北多山水永平之蒼玉屏白雲溪青城  
白鷺洲最佳青城之水過七里灘匯為深淵中  
流有石嶼古松數十株蒼然離立石上兩岸皆  
蒼壁竒巖無石則沙此所謂白鷺洲也余維揚  
歸路從石門訪龍洲公於孫嶺精舍大雪留二  
日辭別公送我至白鷺洲有送別之作吾作白

鷺洲記目以識別

白雲溪記

觀白鷺洲夕至白雲溪在永平之治西五里水益漫沙益平巖壁益嘖然深潭脩瀨上下迷茫日暖冰雪消有水鳥數十飛鳴過之溪間盤石上有蓬萊石峯石刻書可玩潭上有金氏舊業曰金水亭下流數里有蒼玉屏公溪山面皆石故名古朴丞相別業溪上有丞相祠堂

遊三釜落序

三釜落在東州治南三十里龍華下從谷口石



磴數里石巖嶺崦當絕壑石如削上有三石圩  
如釜溪水積焉水深路絕不可俯而窺水三溢  
為三瀑布白波十丈石下潭水潭渚皆白礫往往  
有盤石可坐顏北方言謂瀑為落號曰三釜落  
云孟夏草木始敷溪石間躑躅相映甚佳龍洲  
公與我為山水之約以四月上旬癸卯與古寧  
舊監務許李鎮及胤子督郵君觀於三釜余從  
漣上來關東李按察巡北境行至府偕李使君  
來亦言孤石溪潭之勝因相與娛樂龍洲公屬  
余為序

禾積洲記

砌川之水發源於青華山與花江之水合過陸  
昌為七潭八萬巖至永平北為禾積洲東岸長  
壁松林其下石場皆白石北為石峯立水中百  
尺上有甘潦至靜令人益氣傍有龍穴石下窺  
竇無底川流灣洄當南岸蒼壁浸洲石上多松  
多躑躅風靜日長水波渺漫石場為祀壇水旱  
用牲幣載中祀上流孤石亭一十五里龍洲公  
與我觀三釜瀑布明日遊洲上石場

禾積之水西流至青松北合白雲溪其下大



灘又其下川上松林絕壁為松隅

節婦隅銘

丁未七月

壺口峽大川之涯有松林巖壁謂之松隅丙子  
之亂賊縱兵屠掠有一婦人臨巖壁自墜死之  
不知某家某婦悲其節行無傳改松隅曰節婦  
隅此地稱峽中絕景自多人屠殺後原野多暴  
骸飛鳥不翔集癘疫人多死至今三十年其銘  
曰

石蘄蘄水瀰瀰雲漠漠雨霏霏魂魄孤傷靡所  
託令人悲

言卷之二十一  
澄波渡

澄波渡在漣川縣西十五里漣川古漣州地誌  
澄波渡在漣州實伊勿西境貊地西岸上下江  
壁最奇東岸皆白沙間有白礫往往有古木郊  
烟二十里上流脩瀨曰鬼灘又其上松灘下流  
山深水回渚涯渺茫峽口多列岫其最高者摩  
嵯絕頂

仰巖

澄波渡下流二十里仰巖江上有石峯有高壁  
有重淵古有巨鐘沉於此世遠其事不傳每收



潦水清則鐘可見今不見近百年云江上人言  
國有難則鐘鳴物舊而神者耶江渚皆奇巖蒼  
壁北有麗王祠崇義殿也其東阿彌佛宇

仰巖  
誤為

云阿彌

鄒蘆河在下流鷓鴣巖下有古壘曰江壁為固  
其灘曰鄒蘆灘其南涉江古七重城銅浦在鄒  
蘆灘上高麗林椿江上居云其下南岸卦巖高  
壁浸江石如削有石刻李文靖公題名云今咨  
深不可見從其下大書卦巖二字仍刻石以表  
題名古跡

諒言卷之二十一  
庫硤在卦巖下八月收潦海子以舟為家來集  
於此販魚鹽互市為利江北有四賢祠小下有  
觀魚臺

自瓠蘆河龍山石歧至積雲峽口長壁十里日  
暮山氣益佳

記言卷之二十七終



記言卷之二十八 下篇

山川下

彌智山記

彌智山京城東百五十里彌智絕頂加葉加葉  
北迷源小雪又其北古貊地今壽春花山山水  
最深迦葉下妙德潤筆潤筆下竹杖竹杖南上  
元古時 惠莊大王幸上元作送釐道場仍圖  
畫其事令大學士恒識之其下妙寂妙寂下有  
高麗菩提塔碑龍門最大伽藍 惠莊時大鑄  
佛鐘於龍門佛事甚嚴 賜佛珠百八箴三寶

龍門下有龍門隱者祠

智異山青鶴洞記

南方之山惟智異最深邃杳冥號為神山其幽  
巖絕境殆不可數記而獨稱青鶴洞尤奇自古  
記之蓋在霍溪石門上過玉簫東壑皆深水大  
石人跡不通從霍溪北崖隨山曲而上攀傳巖  
壁至佛日前臺石壁上南向立乃俯臨青鶴洞  
石洞巔巖巖石上多松多竹多楓西南石峯舊  
有鶴巢山中老人相傳鶴玄翅丹頂紫脰日色  
下見翅羽皆青朝則盤回而上入於杳冥夕則



歸巢今不至者幾百年云故峯曰青鶴峯洞曰  
青鶴洞南對香爐峯其東列為三石峯其東壑  
皆層石奇巖前夕大雨瀑布滿壑其臺上石刻  
曰玩瀑臺其下潭水崇禎十三年九月三日余  
從徽陽逌流蟾江過三神洞朝日觀霍溪石門  
又霍溪寺觀崔學士真鑑禪師碑至今千餘年  
莓苔間尚見文字可讀曰登佛日前臺作青鶴  
洞記

### 天冠山記

天冠者南海上神山在長興府治南四十里其

北岬有天冠寺目號為山名浮屠覺圓曰見華  
嚴經又曰支題山支題者塔廟之名絕頂下積  
三大石方而高各數丈餘相傳古初得此為山  
名云下有塔山寺其側有廢刹新羅時有浮屠  
淳釋者居之謂之義相庵云後頂曰九龍峯凡  
有水旱祀之西有通靈臺其東嶺上烟臺傍有  
神井塔山前峯曰佛影峯峯上時有紫氣山中  
或聞鐘鼓響云從北岬登九龍峯望瀛洲其夕  
塔山西巖賞月朝日觀金剛窟從般若臺上神  
蒲石峯有三石圩曰蒲泉產九節蒲登東嶺與



覺圓觀神井水重百斤從東麓鐘峯下窺金水  
窟窟在石壁間中有寒泉有金氣浮滿西日光  
耀巖窟登石大巖在塔山上峯皆疊石石方而  
皆石函形有文皆梵字其側石帆又其側石幢  
幡下有石舟石舟上有凝石形如手北岬東有  
九精社山人夢日月星辰成道氣云山在絕域  
窮海之陬王化之所不及故其古蹟皆浮屠怪  
誕其峯名如普賢毗嘑嘑舍那文殊地藏皆佛  
號毗嘑峯在九龍峯後其側差卑者為石嘑舍  
那其北石帆又其北石幢幡石帆之西南石大

藏其址石文殊又其址石普賢又其址最下有  
九精峯香爐峯在石毗壚下又其最下石神衆  
石地藏峯在九龍西通靈臺側十三年九月既望  
月嶽記

九月始下塔山曰八月嶽遊道岬道岬新羅僧  
道說所居說學道通神能言千載事九山中異  
蹟皆自說翁云至國初有浮屠學祖者居之今  
其佛珠初裝蒲團鐵鶴皆有之又龍巖寺其  
上觀九層浮圖仍登九井峯峯有九龍井遇雲  
霧峯上有巨石如鐘一人搖之則有情十人搖



之亦不過邑有靈巖之名以此云山石如此者  
三一在道岬下一在龍巖下少年臺上雲霧後  
觀天星峯尤神秀下有九折瀑布水積為潭水  
者七皆奇絕可遊上有七池精舍九井南有雙  
石峯其高者青青臺其南佛頂峯其下白雲社  
九井陰崖元曉臺有甘泉詵翁山水記言之龍  
巖下有三石車曰雲車在少年臺東曰馬車在  
雲車北曰鹿車在最下皆山中異蹟鹿車最大  
故謂其洞曰鹿車洞其東北別峯曰孤山下有  
孤山寺南對九井峯多石壁奇巖道岬西北石

峯間有上下見性又下則奉僊庵從青臺下懸手冒雪憇竹社此奉僊庵也其僧應均為之請作奉僊庵記又作大篆與之雪夜還道岬有學者數人來相待講士喪禮十三年孟冬初吉眉叟記

嘗聞月嶽陰崖產蕙草山人皆不知惟溪石間蓀草盛茂莖葉皆香南海上諸山多有之冰雪上皆青

道岬下立石刻國長生其下皇山又立石刻皇長生父老傳說道詵為之萬曆中元帥西平公



出巡湖南過此掘國長生其下刻石標四座石  
深八欲發之以為徒無益復埋之鳩林又有立  
石西湖石浦又有立石刻曰某年某月埋香其  
年月字漫滅不可見

清涼山記

太白東南為白石又南為頭陀又西南為清涼  
清涼在安東府治北九十五里才山縣山巉巖  
獨高於衆山之中蒼然偃蹇騰踔奇屹卓出謂  
之小金劉云其最北絕頂三石峯曰紫鸞峯又  
其南麓石峯曰僊鶴峯下有蓮臺寺西望蓮花

言卷之二十八  
峯其青壁上有義相窟路絕不可攀自蓮臺東  
隅攀石壁上真佛其上元曉從東普賢廻而西  
直由巖隙數百仞窺元曉井又東少下至元曉  
前楣有題名闕逢執徐周景遊九字餘墨脫不  
可見又直從山石間登滿月其西臺最奇絕在僊  
鶴峯上絕頂之東南曰紫霄峯其高與絕頂齊  
其西南崖谷間有白雲庵最在層峯石上多烟  
霞多古木青蘿蓮花西南次峯曰香爐峯其西  
曰丈人峯又其西曰外丈人峯皆石無草木硯  
碑在烟霞之表紫霄峯東南曰擎日峯自山中



望之每中春之月晝夜正中日出其上中秋亦然自擎日峯下山勢少下復起於西南為祝隆峯北與絕頂相對視他峯獨鬱然有巖嵒積翠陰崖產石蓮五月白花始秀其址麓與外丈人相對山中衆壑之水合流過此祝隆傍有古城西谷口與東南斷峯下皆有古城擎日峯西麓又有石峯山石壁立一層上又一層者三間有洞竇巖房望之蒼蒼如鐵壁謂之金塔云最在衆峯之中從北崖鑿石開徑上有般若臺其側泉出石窟極冷例南出十許步曰瑤草臺又其

南有致遠庵北壁有甲子清和退陶李先生題  
名又南卅餘步有極一庵從此隅迴而東入巖  
穴數仞上曰孤雲窟窟有木榻殆千年謂之孤  
雲榻窟在深山石壁高處炎夏生涼或曰風穴  
臺又其南少下有安仲庵其側有安仲等身前  
階石壁上曰彩霞臺又其東少下曰靈山殿從  
石壁上轉而東數十步曰上清涼又其東少下  
曰下清涼或曰本清涼識其最舊云又轉而少  
北曰擎日庵度一壑又北逾擎日西麓當石絕  
橫木為梯繞過有金生窟上有瀑布其高半山



窟又在瀑布之半水落窟前盤石上其下又半  
山石皆白波從金生窟北至穹林盤石上曰驂  
鸞臺其側有上下大乘又少北文殊石壁觀瀑  
布其西晉賢之西巖曰喚僊臺衆峯環立皆蒼  
壁千丈巖石上下蘭若十六每烟霞始收望之  
縹緲尤奇洛川之水發源於黃池南流至丈人  
峯下洄流過谷口多堪巖白礫湍瀨磕磕至祝  
隆峯西兩岸壁立相對為石門曰孤山有琴氏  
舊業水至此益漫其外平蕪白沙折而西流五  
里至丹砂峽又西流三屈折而至陶山尚德祠

下為濯纓潭

冰山記

冰山在聞韶南四十七里山積石磊砢多竅穴  
若雷若扉若圭戶若竈若房殆不可數記立春  
寒氣始生立夏冰始澌至夏至之極冰益壯寒  
氣益冽雖大暑盛德在火燿燠方盛寒冽地凍  
草木不生立秋冰始消立冬寒氣盡至冬至之  
極竅穴皆虛以見冰於無冰之節志異故山謂  
之冰山溪謂之冰溪嘗聞天地之氣春夏則訥  
噓發育沍陰在內秋冬則闔歛閉藏溫厚在內



此蓋巖竅穴疎通無底地中伏陰之氣於是  
焉泄矣故立春而始寒立夏而始冰夏至而冰  
壯立秋而冰消立冬而冰盡冬至而竅穴虛則  
一陰一陽消長往來之氣驗矣然既論地氣之  
磅礴東南為不足故其浮疎泄漏者如此其西  
百數十里主屹下有潮汐泉去海上四百餘里  
其盈涸與海為消息云

月影臺記

月影臺在昌原府治西三十里合浦古壘傍當  
大海西畔隔海東望熊山每月既望初昏海潮

方滿登臺觀月影月出海單山成影月影在海  
中積九十七億三萬八千尺有奇而極月離山  
則影散余嘗於東海外極天垠望月出月出無  
影海澄明與此景相殊狀皆為異觀新羅史真  
聖時有崔致遠初事唐僖宗知天下亂去歸國  
又新羅政衰遂遺世逃隱於是有操鷄搏鴨之  
語其傳稱致遠遊月影臺云今昌原有俚語相  
傳言崔學士古事皆怪誕不足信又其俗尚淫  
祀於臺上巫覡日擊鼓掛紙牋以禱祀往往得  
靈異云海隅無文獻可徵其傍海上有孤雲臺



蓋後世有好事者名之也

五臺山記

寒溪東為雪嶺雪嶺南為五臺山高大深邃山  
氣最積者五謂之五臺其最北為象王山極高  
峻其絕頂為毗廬峯其東次峯為北臺有甘露  
井毗廬南地爐地爐上為中臺山深氣清無鳥  
獸釋子曉禮無像佛於此此最極也中臺少下  
有獅子庵我 太上神武王所建也 命叅贊  
門下近作獅子庵記有玉井下流為玉溪社臺  
東南為滿月其社雪嶺滿月絕頂為東臺東臺

之水為青溪登東臺望赤海出日象王西南為  
長嶺其上西臺西臺汲神井謂之于筒之水與  
寒松仙井并稱靈泉長嶺東南為棋麟其上南  
臺其南麓有靈鑑寺歲史於此上院在地爐南  
麓山中佳寺東隅有大木枝幹赤葉類檜霜墮  
則葉凋謂之老杉或曰枕也遊上院登中臺五  
里又登北臺五里西登長嶺十里青溪十五里  
南臺十里又南十里月精月精上觀音西與鐘  
峯相對而俯鐘峯在長嶺西南此舉其最大者  
識之山蓋多土少石山木多檜山中之水合流



為大川至南臺東壑為般若淵至月井下為金  
剛淵

青鶴洞九龍淵記

臺山東麓為白馬山連谷縣直西五十里山皆  
石山巖岫翠嶺其東麓別峯為鶴臺山石尤奇  
鶴臺東南石洞曰青鶴洞有九龍淵水流巖石  
上為九折瀑布瀑布下皆淵水其石上大書九龍  
淵奇字出洞皆奇巖峭壁其下溪上盤石曰飯  
僧巖過石梁山曲石磴下臨峻谷曰觀世音遷  
也溪深路絕從址崖逾栢嶺至曲淵水深黑大

石浸淵石下無底過曲淵土谷山中佳村

寒松亭記

十月二日宿史東早出寒松道上見山花初發如春至亭上海岸荒原斷壠往往有二三松樹而已父老曰古有千歲深松寒影蒼蒼至今有寒松之號云亭下觀述郎井井筭小石為之穿盤石覆其上苔深水清若泉出石竇泉甘與長嶺子筒之水并稱神井其下石盤長六尺廣三分長之二深一尺作石圩上與槃齊其底有竅向外其傍琢奇石狀若蟠螭昂首而兩出洶其



半水滿則石蒼然尤奇又傍置石如槃鑿三石  
圩皆奇詭異狀謂之石竈石池者也海上皆白  
沙謂之白沙汀沙上松林甚遠有沙堤如山臨  
大海觀蜃樓百丈

東海頌

陟州古悉直氏之地在獫狁南去國都七百  
里東臨大海其頌曰

瀛海溟濊百川朝宗其大無窮東北沙海無潮  
無汐號為大澤積水稻天淳滴汪濊海動有暄  
明明陽谷太陽之門羲伯司賓析木之次牝牛

之宮日本無東蛟人之珍涵海百產汗汗漫漫  
奇物譎詭宛宛之祥興德而章蚌之胎珠與月  
盛衰旁氣昇霏天吳九首怪變一股颺回且兩  
出日朝曦輦輶炫熿紫赤滄滄三五月盈水鏡  
圓靈列宿韜光扶桑以華黑齒麻羅撮髻甯家  
蜺蠻之鰲爪蛙之猴佛齊之牛海外雜種絕儻  
殊俗同圉咸育古聖遠德百蠻重譯無遠不服  
皇哉熙哉大治廣博遺風邈哉

山水記

老人無事對積石追憶遠遊往迹記山水事



智異山記

百丈南君子寺智異北麓古寺其下龍游潭水  
旱用挂幣潭水發源於般若峯下東流為臨溪  
又東流為龍游潭洞壑石場兩崖水流石上有  
石坎石竇石坑若蛟螭蜿蜒蟠屈蚪虬奇詭百  
狀水深黑濱湧盤渦回旋沸白無淺渚者里餘  
其下脩瀨又里餘曰水潺東流為馬川嚴瀨從  
君子南崖登白母帝釋其上天王峯一萬四千  
丈為絕頂多苦寒山木不長八月三雪其觀望  
東盡日域近海黔魅尊芝絕影其外馬島為日

本之倭其西燕齊之海大陸千里極南耽七羅  
以外眼力不及

德裕山記

南方名山絕頂德裕最奇九千磊上七峯七峯  
上香積峯山在感陰高澤景陽數郡之地直南  
天嶺雲峯與天王絕頂並峙列岫烟霞三百里  
峯上有泓泓上白沙其木多異香冬青赤幹葉  
如杉樹高數丈泓涿淨沙上深樹異香上山有  
二途其一從感陰渾川上九千磊六十里又其  
一從景陽水礫登獅子嶺而至



伽倻山記

自德裕修道武屹有鄭氏藏書至伽倻海印新羅古寺有八萬大藏經南山石崖傳說新羅崔學士巖居川石間有紅流洞吹笛峯光風瀨吟風臺完在巖噴玉瀑落花潭疊石臺會仙巖出洞有武陵橋七星臺皆石刻學士大字

五臺山記

五臺在蒼海西百四十里其北雪嶽古獬豸之域山高深邃多積氣者象王智爐青溪長嶺棋隣五山絕頂皆有臺謂之五臺人跡絕遠巖

山言卷之二十八  
出杳冥青溪東臺望赤海出日象王南智爐最  
在山中多灝氣無鳥獸道人曉禮無像佛於此  
此最極云棋隣靈鑑太史所藏長嶺子筒之水  
稱神泉與山中之水合流至棋隣東壑為般若  
淵月井下為金剛淵漢水之源

### 太白山記

太白山新羅北嶽文殊大朴三台虞甫虞檢摩  
羅邑白山皆大山蟠據東曉真番之域太白文  
殊最高大北連頭陀普賢東極滄海積翠六七  
百里文殊絕頂皆白樂望之如積雪山有太白



之名以此云孟春日在營室寒日滌凍塗上巾  
衣俯瞰杳冥西南望太白雪山塞空絕頂埋雲  
霧不可見雲霧下大麓皆深山沍陰其下百石  
坪山上有太白祠太白南八十里覺化太史所  
藏山出蓼苓芎藭當歸群藥蔓生栢環材紫檀  
栲實三寸誌言東海三寸樵此也薩奈淨巖之  
水西北流入太陰江下虞南九沙屹下流為五  
十川東流百餘里入海黃池在虞南西十里與  
山中之水合而西南流過百石坪二十里穿山  
石南流為洛東源曰穿川前古置祭田水旱祀

之

壬子八月希仲將遊楓嶽仍出東界觀日出  
過我石鹿求言作讀地誌東遊博物六百餘

言書贈

楓嶽讀地誌

嘗讀地誌怛怛東海上名山巖岵砢砢砢萬  
有二千毗嘯國望最高大瞰日域赤海無東山  
水萬瀑洞九龍淵最奇伽藍蘭若百八所其名  
剎摩訶衍最深普德窟次之表訓又次之長安  
最在下大祀萬五千五十三佛長安表訓初作



於新羅法興時麗氏崇奉五百年至元之末世  
奇后祝釐歲出內帑幣千數以增飾云正陽在  
山之中地界最高瞰列岫層巒杳冥無窮榆岵  
在毗嘯東九井南我 惠莊十二年因古寺增  
作之最大刹前川出南石事佛之世置京庫二  
所收東界田租以供浮屠一在烈山一在百川  
橋外忼忼或曰楓嶽或曰皆骨山浮屠人謂之  
金剗山佛書云曇無竭所住與烏次支題皆其  
大言者云作讀地誌二百二十九言

東界

東遊博物

東界通川叢石金欄石文習溪穿島石竇通南  
北風濤相拍風靜則自穿島絕海至叢石八九  
里自叢石絕海至金欄窟十餘里巖窟奇石怪  
狀不可記

高城丹穴三日浦石龕丹書迂城三大湖烈山  
北明波海岸皆鳴沙躡則沙鳴襄陽洛山寺觀  
音窟昔我翼祖禱祠於此云雪嶽從襄陽海  
上西北行五十里山極高峻中秋始雪至夏至  
雪消其西寒溪南峯危壁其極絕頂其下深淵  
山石神秀歲硯不可名狀懸瀑三百尺川流盤



廻出圓通谷口渡三十六石梁江陵古獵國漢  
元朔間初置滄海郡四郡時為臨屯郡海上鏡  
浦寒松下述郎并石竈石池平海之越松浦于  
山薺陵一島望三峯岷嶺海晴則山木可見山  
下白沙甚遠古于山國負固不服新羅以計降  
之至高麗有白吉土豆獻方物此皆東界古事  
古跡老人嘗客遊過此特詳之列書以為東遊  
博物二百八十七言

記言卷之二十八

記言卷之二十八終



記言卷之二十九 下篇

書畫

王孫朗善君金石貼序

公子朗善君我 宣祖親王孫也不以尊貴自  
居居處被服如儒士爲好文墨古事嘗聘大國  
於今雖文獻壞亡猶博求前古遺文得衡山神  
禹碑七十七文觀龍蛇怪神狀公子於書可謂  
極博矣又求觀大東名人書如山碑海碣陵寢  
群祠浮屠古蹟古今墟墓之文過百餘貼其舊  
者自新羅金生崔學士至今千餘年其遠者妙

香雲門智谷皆千里而遙其間隣閭興法白月  
碑最舊遠皆千年古寺槩論之書為天地之文  
世降文亦降古者太昊氏始作書契三代各異  
書隸書始於後秦魏晉氏來又變而為楷草書  
書體縱不及蒼籀書然其理則一也故嚴正祇  
肅有古書之遺者或有縱蕩自恣不可模狀者  
亦有怪怪奇奇極造化之妙者殆如鬼神焉大  
則日月星辰之炳耀散則如鳥獸虫魚草木之  
奇珠璣花實之美麗觀於此盡矣善乎公子之  
賢於藝可謂善游者也 上之八年十二月下



澣眉叟書

趙文正公蘭竹詩畫帖跋

丙戌冬穆行嶺南過趙君於三年城下君出示  
墨畫蘭竹七帖上皆有五言詩昔正德年中葵  
亭姜內翰濇得尹彥直蘭竹八帖趙文正公各  
題詩其上未久禍作至今為儒林之痛何可勝  
道哉嗟乎世移事易墨跡猶在而語苦志潔足  
令人感惋嗚咽出涕姜氏傳世寶畜之至萬曆  
兵亂失之適有趙平澤守倫少時一誦玩而悅  
之及年老猶誦之尚恨忘其一文正公有曾孫

婦柳氏聞其事手織素求畫於當世之名能畫者李徵而又各題詩其上一如舊跡善哉乎賢者之世果有賢婦人能不泯其古事如此君文正公之玄孫而柳夫人之子今宗廟令趙松年也

朗善公子畫貼序

畫雖不列於六藝亦書之次也載籍以來軒轅氏始作文章著貴賤唐虞氏作十有二章周公作九繪武丁象形得說于傅巖之野明堂畫堯舜桀紂忠臣烈女聖賢愚暗之成衡山九鼎物



怪神姦魍魎魅靈光比翼九頭鱗身蛇軀鴻  
荒睢盱圖畫良相猛將起於狶獐殿唐時摩詰  
畫孔子劉奉先作赤縣滄洲圖倪氏畫梅畢宏  
畫松夏少正畫竹名天下至今吾東方自新羅  
來海印佛壁見千年古畫稱吳道子畫高麗敬  
天石塔浮屠圖聖居華嚴有恭愍照鏡自寫圖  
至我 盛朝顧仁安堅稱絕畫其後多名畫今  
於朗善王孫書畫貼又見恭愍天山大獵圖安  
堅李上佐李楨李激山水圖鶴林竹林二公子  
人物翎毛圖金司圃牧牛游馬石陽之竹魚少

言言卷之七  
正之梅皆絕畫我朝人才絕藝其盛亦極於此  
云強圉協洽良月月半眉叟識

模朱太史十二畫貼圖序

槩論九州山澤之勝稱洞庭彭蠡如黃鶴樓岳  
陽樓滕王閣最名天下又得文章傳後代者桃  
源蜀道赤壁兔園之雪秋坂之月金山西湖蘭  
亭曲水滁州醉翁亭岐陽喜雨亭泉明栗里羅  
鶴林幽居又如白樂天聽琵琶長作歐陽子秋  
聲賦黃州竹樓記仲長統樂志論皆入畫圖凡  
十二貼圖下歷代名家傑作皆膾炙天下如衡



陽匯澤岍雍禹跡所極蚕叢魚鳧之所開一閱  
過可舉而又晉唐來山水古蹟寓心興感者皆  
於此乎得之矣此貼初本萬曆詔使宋之輦手  
畫進宣廟其副本贈西垌柳相公傳於家今  
又得此本模此云又求書皆一時文學趙龍洲  
孫晚悟李聽蟬吳竹南以下累十人亦可觀識  
之上之十年三月上弦前一日眉叟書

葡萄貼記

凡技藝之妙不專則不得如咸從氏之於梅黃  
氏之於葡萄石陽公子之於竹皆專一藝而名

其時至今數子之後傳其妙者蓋久寥寥矣吾十年前於季弟恭叔處得終南老人墨葡萄新畫其蔓枝嫩葉垂結子者深得前人之妙殆有神者今其人已亡不可復得聞其將死屬其家人曰吾畫絕奇而世無知者幸而有紫峯公知吾畫且其文必傳後以吾死告持吾畫請一言藏之吾死無可恨者余知其絕藝難得嘗屢稱之悲夫斯人者其自知者深而遇知者難故云也其心良苦於此其人與畫可知也徒使我潸然出涕余何愛一言以負已死者心哉



牧牛圖記

六年春余居連上有客從吳殿中來持牧牛圖示余兩景雪景為二圖有平川野樹郊墟遊牛有行者立者吃草者童子有跨者有下者有被蓑者有戴蓑笠者有持釣竿者其下時之名公學士咏畫酬唱詩成一什余無他事老於耕牧或燒菑種秫或牧牛平蕪垂釣清溪日夕墟烟生暝色罷釣驅牛而歸此老人耕牧而樂者也今時已孟春寒日滌凍塗雉震响魚陂負水農緯耒治田對此畫悠然有郊原間暇之趣喜而

書之為牧牛圖記丁未正月月中連上老人書

記言卷之二十九終



記言卷之三十 雜篇一

邊塞

東女真靺鞨遺種高句麗部落地方三百里東極于海西至蓋馬山南接于長定二州地本句麗舊地高麗肅宗十年女真數寇邊將大發兵討之肅宗歿睿宗立二年秋以尹瓘為大元帥吳延寵為副元帥發十七萬衆擊破女真部落定疆域東至火串嶺北至弓漢嶺西至蒙羅骨嶺并所侵之地鐵嶺以北千餘里置九城曰咸州曰英州曰雄州曰吉州曰福州曰宜州曰公

言其言卷之三十  
五  
岌鎮曰通泰鎮曰平戎鎮為北界咸州今咸興  
府英州在蒙羅骨下雄州在吉州火串嶺下福  
州古禿魯兀今端川郡宜州在定州南公岌鎮  
在會寧府蘇下江濱先春嶺東南豆蒲江北七  
百里三年立石記功於先春嶺以為界

咸州置大都督府諸州鎮皆置防禦使女真強  
四年悉還其地後沒于元恭讓二年定北邊復  
置吉州以英州諸鎮皆屬吉州

高麗初定女真拓地浸廣以鐵嶺為界至 睿  
宗時雖置九城旋得旋失我 太祖定北邊置



孔鏡吉端青洪咸七州

太祖七年幹木河實國祖王跡所基置慶源府  
後為女真所侵 太宗九年移府於蘓多老明  
年女真復入寇徙其民於鏡城虛其地又移府  
於富居增置寧北鎮於石幕以為塞幹木河後  
為童孟哥帖木兒所據兀狄哈擊滅之 世宗  
十六年以金宗瑞為咸吉道都節制使使復孔  
鏡古地宗瑞受命三年時議爭言不便謗書曰  
多龍城之固無山川之阻實四散之地而富居  
石幕皆非疆域之慶賊滅之後布置城邑疆域

復完萬世之利也況祖宗舊疆不可棄也上  
築城便宜累千言上善其策以邊防事專責  
於宗瑞移寧北鎮於伯顏愁所幹木河西北當  
賊路之衝而幹朶里遺種所居置大鎮以塞北  
門復置慶源將於會叱家增築孔州古邑城以  
豆滿江為界大鎮置勸直五品寧北蘓多老徒  
塞內民戶各一千一百戶不足慶尚全羅忠清  
江原諸道移戶四百拓地六百餘里十五年上  
遣崔潤德帥萬餘兵伐忽剌溫斬首虜四百十  
九年復使李藏發塞上兵三千伐婆豬雜種悉



燒其廬舍積聚斬首虜百數上甚尊寵宗瑞與皇甫仁並為相魯陵二年靖社時被誅

幹木河直豆蒲江南胡語幹木河亦曰吾音會今會寧府會叱家伯顏愁所蘓多老古孔州之地而會叱家今慶源府慶源古跡有蘓多老古營之地石幕富居富寧古郡名石幕今富寧府龍城古鏡州北境寧北鎮今鏡城府

其築城疏有曰議者皆以龍城如秦之函谷其地無山川之阻實四散之地若以龍城為界薄則磨天嶺為界又薄則鐵嶺為界高麗可鑑

也況祖宗舊疆王跡所基棄而不守謂冒昧  
冒獲其有後乎有浮言之徒妄引初年之雪次  
年之疫徒以沮大事而毀前功矣成大事者不  
顧小弊建大業者不計小害母求速成母見小  
利積慮以歲月持之以不變然後浮言自定民  
怨自息民弊自去民食自足兵力自強寇賊自  
屈新邑永固矣

茂昌郡本間延府之上無路 世宗二十三年  
初置茂昌縣其明年陞為郡治東一百三十里  
原州八十里南山皆古戍東至甲山磨上和一



百六十里西至間延所溫梁一百三十里南至  
慈城竹田八十里其北清河一里

間延府本甲山府之古間延村 太宗十六年

初置間延郡 世宗十七年陞都護府割甲山

之小薰豆以西益東境之地東至茂昌多落仇

非四十五里西至虞芮下無路北六十五里南

至慈城新路一百五里其北清河四里

虞芮郡本間延府之下無路 世宗二十五年

置虞芮郡治西有小虞芮治東下無路三十里

南至慈城芮叱項五十里治北趙明于二十里

西一里清河其外禿魯江

江界

慈城郡在間延之番江江界府東境一百三十里慈城北一百二十里相土其外忽刺溫三水誌三水西古茂昌西境一百十里云

四郡之地東自虛川西至禿魯江萬年四百四十三里南北自清河至永興陽德之境五百里本肅慎靺鞨之墟朝鮮古地沒於女真我太宗世宗置六鎮於北界又置四郡於清河忽刺溫兀良哈婆豬羅胡數寇邊世宗十五年遣崔潤德討破之十九年又遣李歲討之世祖



元年棄四郡九百餘里以絕胡

邊塞之制

禹貢綏服之地三百里揆文教二百里奮武衛  
所以安中國而固邊疆也其外要荒之服要曰  
蔡荒曰流蠻夷之地

政官正其封疆無有仇邪離絕使小國事大國

大國比小國

仇苦蛙反  
邪似差反

正邦國之八法八則觀其慝使毋敢反側為惡  
八法官屬官職官聯官常官成官法官刑官計  
八則祭祀法則廢置祿位賦貢禮俗刑賞田役

治官府都鄙者也

通其財利同其權衡度量除其怨惡同其所好  
所善

詔遠方之政俗與其上下之志誦其遠人之傳  
道古事

辨其丘陵原隰與其山澤之名物與其利害而  
詔之致其珍異之物

致方貢遠物厚其送逆委積館舍飲食

中庸九經之治送往迎來嘉善而矜不能朝聘  
以時治亂持危繼絕世興滅國厚往而薄來德



博而威廣天下畏服者也

軍禮有五用衆尚勇也恤衆均賦也簡衆習兵

也任衆力役也聚衆正封疆溝瀆也

周官宗伯職軍禮五

一大師之禮用衆也用其義勇也二大均之禮恤衆也均其地政地守地職之賦也三大

田之禮簡衆也因田習兵也四大役之禮任衆也建城邑役民力強弱也五大封之禮合

衆也正封疆溝塗之固也

周官司馬職環人掌致師察軍慝環四方之故

巡邦國搏謀訟敵國揚軍旅降圍國

以同律聽軍聲吹律而合商音其軍強合角音

其軍亂合宮音其軍和合徵音其將急其軍勞

合羽音其軍弱師曠曰驟歌北風又歌南風南  
風不競多死聲

倭人通貨

正統八年倭寇上國又掠我濟州為邊將所擊  
敗遁歸我 莊憲王遣使責問馬島馬島獻首  
亂者以功許五十船歲至正德五年三浦倭叛  
陷我薺浦熊川殺邊將我 恭僖王遣柳珣年  
討破之絕和親七年更定約條許二十五船  
萬曆三十七年自壬辰兵革後始許通貨開市  
二十船歲至使者來時許三船或二船在二十



船約條之內倭人無引文者不由釜山來者皆以盜論

南海防戍

東萊南馬島七百里

東萊西多大浦五十四里加德天城安骨浦薺浦諸鎮在多大西加德天城二鎮舊在海中自壬辰大亂後移之海上

薺浦熊川縣南五里安骨浦縣南二十里加德島本海中絕島古天城一島

巨濟縣在加德西鎮海縣隔海在其北固城縣

言言卷之三  
在鎮海西巨濟固城間見乃梁統制營在其西北而閑山島殺其南巨濟南大洋

巨濟南有加羅山山東知世浦玉浦助羅浦三鎮之地其南加背梁率非浦栗浦知世浦最要害處

倭人之路過東萊熊川巨濟至見乃梁統制營大兵處巨濟以東如堂奧之有門牆也

加羅山在巨濟縣南三十里見乃梁在縣西三十里縣東玉浦十九里助羅浦二十八里知世浦二十九里栗浦三十里加背梁在固



城縣南三十四里率非浦在固城西四十七里

固城西泗川縣又西南海縣其外湖南境

治體

忠州節愛堂記

上之十四年忠州權使君作聽治之堂蓋仍舊  
作而修創之也名之曰節愛之堂孔子所謂節  
用而愛民者也州古之國原新羅時徙貴戚六  
部豪傑置小京其地據大嶺之阻為嶺海之都  
會土沃富饒多賈先王之治所重民食食者民



之所急貨者民之所資食先而貨次之管子曰  
牧民務在四時守在倉廩止民管莫如禁文巧  
文巧糜財之大禁用之無節則財匱財匱則力  
屈力屈則貼危食節事時量入以為出厚積儲  
大小富樂然後禮樂之教可興故制節謹度政  
事之大務節用又愛民之本不特一州之治為  
然措之於天下國家皆然昔者管仲治齊修太  
公之舊置輕重九府天下朝齊善乎使君之治  
可謂明於體要者也使君諱大載字仲車永嘉  
人關逢攝提格仲春六日孔巖許穆記



